



Broj: 02-04-1291/24-AP-3  
Datum: 11.06.2024. godine

Na osnovu člana 10. i 15. Privremene Statutarne Odluke Grada Zavidovići („Službeni glasnik Općine Zavidovići“, broj: 4/2022), člana 25. i 105. Statuta Općine Zavidovići („Službeni glasnik Općine Zavidovići“, broj: 5/2008, 5/a/2008 i 11/2019), člana 7. i člana 9. stav (5) Zakona o ministarskim, vladinim i drugim imenovanjima Federacije Bosne i Hercegovine („Službene novine Federacije Bosne i Hercegovine“, broj: 12/03, 34/03 i 65/13), Gradsko vijeće Grada Zavidovići, na \_\_. sjednici održanoj dana \_\_. \_\_. 2024. godine, donosi

### O D L U K U

o izmjenama i dopunama Odluke o standardima i kriterijima za imenovanje u Upravni odbor Javne ustanove „Dom zdravlja“ Zavidovići

#### Član 1.

U Odluci o standardima i kriterijima za imenovanje u Upravni odbor Javne ustanove „Dom zdravlja“ Zavidovići („Službeni glasnik Općine Zavidovići“, broj: 4/2012, 2/2015, 5/2020) u cijelom tekstu riječ „općine“ mijenja se sa riječi „grada“, riječ „općinskog“, mijenja se sa riječi „gradskog“, a riječi „Općinski načelnik“, mijenja se sa riječi „Gradonačelnik“, u odgovarajućem padežu.

#### Član 2.

Član 2. stav (2) tačka h) Odluke mijenja se i glasi:  
“da nije osuđen za krivično djelo nespojivo sa imenovanjem u upravni odbor, pet godina od dana pravosnažnosti presude, isključujući vrijeme zatvorske kazne.”

#### Član 3.

Član 2. stav (5) Odluke, mijenja se i glasi:  
„Nadležna služba Grada Zavidovići obavezna je obavijestiti Ministarstvo zdravstva o raspisivanju javnog oglasa za imenovanje Upravnog odbora Javne ustanove „Dom zdravlja“ Zavidovići.

#### Član 4.

U članu 2. Odluke iza stava (5) dodaje se stav (6) koji glasi:  
„Ministarstvo zdravstva Zeničko-dobojskog kantona provodi kompletan postupak izbora svog predstavnika u upravni odbor (raspisuje javni oglas i imenuje komisiju za izbor koja provodi proceduru javnog oglasa, te ime izabranog predstavnika Ministarstva zdravstva za poziciju člana Upravnog odbora Javne ustanove „Dom zdravlja“ Zavidovići dostavlja nadležnoj službi Grada Zavidovići kako bi se navedeno lice uvrstilo u akt o konačnom imenovanju Upravnog odbora koje vrši Gradsko vijeće Grada Zavidovići.“

Član 5.

Ova Odluka stupa na snagu prvi naredni dan od dana objavljivanja u „Službenom glasniku Grada Zavidovići“.

PREDSJEDAVAJUĆI  
GRADSKOG VIJEĆA

Admir Fojnica, prof.

## O B R A Z L O Ž E N J E

### USTAVNOPRAVNI I ZAKONSKI OSNOV ZA UVOĐENJE ODLUKE

Članom 25. Statuta razrađene su nadležnosti Gradskog vijeća u okviru samoupravnog djelokruga rada Grada, tako da je predmetna Odluka u nadležnosti Gradskog vijeća.

U članu 7. i članu 9. stav (5) Zakona o ministarskim, vladinim i drugim imenovanjima Federacije Bosne i Hercegovine propisano je:

#### Član 7. (Standardi i kriteriji)

(1) Svi kandidati za imenovanje u regulirane organe dužni su ispunjavati sljedeće uvjete:

- a) biti stariji od 18 godina,
- b) nisu otpušteni iz državne službe kao rezultat disciplinske mjere na bilo kojoj razini u Bosni i Hercegovini (bilo na razini države ili entiteta) u razdoblju od tri godine prije dana objave upražnjenog položaja,
- c) na njih se odnosi član IX. 1. Ustava Bosne i Hercegovine.

(2) Osim ovih općih uvjeta, u svrhu određivanja temelja za izbor prema kvaliteti, odgovorni javni službenik će utvrditi standarde za izbor i ocjenjivanje u smislu stupnja naobrazbe, znanja, iskustva, poznavanja stranih jezika i drugoga, što je, prema njegovu mišljenju, neophodno ili poželjno s obzirom na prirodu poslova koje treba obavljati.

(3) Prilikom utvrđivanja ili primjene standarda iz stave (2) ovoga člana, odgovorni javni službenik neće vršiti diskriminiranje prema bilo kome na temelju rase, nacionalnog ili etničkog porijekla, boje, vjeroispovijesti, spola, bračnog statusa, obiteljskog statusa, invalidnosti ili postojanja osude za koju je izrečeno pomilovanje.

(4) Odgovorni javni službenik kriterije za imenovanje čuva u evidenciji.

#### Član 9. (Komisija za izbor)

1. Komisija za izbor je zadužena za pregledanje prijava.
2. Odgovorni javni službenik imenuje članove komisije za izbor. Komisija za izbor se sastoji od pet članova.
3. Prilikom imenovanja komisije za izbor vodi se računa o zakonu ili statutu na osnovu kojeg je osnovan organ. Ako je u tom zakonu ili statutu o osnivanju organa propisan posebni postupak izbora ili sastava komisije za izbor na pozicije u reguliranom organu tada se postupa po odredbama tog zakona ili statuta.
4. Ako je organ u kojem se vrši imenovanje u cjelokupnom vlasništvu nadležnog organa i nadležni organ ima potpuno ovlaštenje za imenovanje u reguliranom organu tada odgovorni javni službenik samostalno imenuje komisiju za izbor iz stava 2. ovog člana, te se komisija sastoji od uposlenika tog organa.
5. Ako je u zakonu ili statutu propisano da i drugi organ ima ovlaštenje za imenovanje svojih predstavnika u regulirani organ, tada odgovorni javni službenik tog organa imenuje svoju komisiju za izbor za one predstavnike za koje je nadležan i provodi postupak u skladu sa ovim zakonom.

## RAZLOZI ZA UVOĐENJE ODLUKE I OBJAŠNJENJE ODABRANE POLITIKE

Osnovni razlog donošenja ove Odluke je usklađivanje Odluke sa Zakonom o ministarskim, vladinim i drugim imenovanjima, kao i činjenica da nadležni sudovi ne izdaju uvjerenja o privrednim prestupima, već samo uvjerenja da lice nije osuđeno za krivično djelo.

Obzirom da se ne radi o složenoj i obimnoj Odluci, predlaže se njezino donošenje po skraćenom postupku u skladu sa članom 130. Poslovnika o radu Gradskog vijeća Zavidovići - novi prečišćeni tekst („Službeni glasnik Grada Zavidovići“, broj: 7/2022 i 1/2023).

## USKLAĐENOST ODLUKE S KANTONALNIM I FEDERALNIM ZAKONODAVSTVOM

Prijedlog Odluke je usklađen sa Zakonom o ministarskim, vladinim i drugim imenovanjima Federacije Bosne i Hercegovine kada je u pitanju nadležnost Gradskog vijeća Zavidovići za donošenje ove Odluke kao i ispunjavanje općih uslova za imenovanje na upražnjene pozicije regulisane ovom Odlukom.

## OBRAZLOŽENJE PRAVNIH RJEŠENJA U ODLUCI

U članu 2. stav (2) tačka h) Odluke o standardima i kriterijima za imenovanje u Upravni odbor JU „Dom zdravlja“ Zavidovići koja glasi „da nije osuđen za krivično djelo i privredni prijestup nespojiv s dužnošću u upravnom odboru zdravstvene ustanove, pet godina od dana pravosnažnosti presude,“ bilo je potrebno izmijeniti navedenu tačku iz razloga što nadležni sudovi ne izdaju uvjerenja o privrednim prestupima, već samo uvjerenja da lice nije osuđeno za krivično djelo.

U članu 2. stav (5) Odluke koji glasi: „Za člana Upravnog odbora Javne ustanove „Dom zdravlja“ Zavidovići iz stava (1) ovog člana ispred kantonalnog ministarstva može biti imenovan kandidat kojem Ministarstvo zdravstva Zeničko-dobojskog kantona da saglasnost za imenovanje u Upravni odbor. U slučaju da izostane saglasnost od strane Ministarstva zdravstva Zeničko-dobojskog kantona, Općinsko vijeće Zavidovići imenuje za člana Upravnog odbora Javne ustanove „Dom zdravlja“ Zavidovići prvorangiranog sa liste uspješnih kandidata za člana predstavnika kantonalnog ministarstva.“ potrebno je uskladiti sa članom 9. stav (5) Zakona o ministarskim, vladinim i drugim imenovanjima koji glasi: „Ako je u zakonu ili statutu propisano da i drugi organ ima ovlaštenje za imenovanje svojih predstavnika u regulirani organ, tada odgovorni javni službenik tog organa imenuje svoju komisiju za izbor za one predstavnike za koje je nadležan i provodi postupak u skladu sa ovim zakonom.“

## ODREDBE ODLUKE KOJE SE MIJENJAJU

### Član 2.

„Kandidati za imenovanje na upražnjenu poziciju predsjednika i članova Upravnog odbora zdravstvene ustanove, treba da ispunjavaju opće i posebne uslove za imenovanja koji su utvrđeni ovom Odlukom.

Opći uslovi za imenovanje na poziciju predsjednika i članova Upravnog odbora zdravstvene ustanove, su:

- a) da je državljanin Bosne i Hercegovine,
- b) da je stariji od 18 godina,

- c) da nije otpušten iz državne službe kao rezultat disciplinske mjere (bilo na nivou države ili entiteta), u periodu od 3 godine prije dana objavljivanja upražnjene pozicije,
- d) da nije pod optužnicom Međunarodnog suda za ratne zločine u bivšoj Jugoslaviji (član IX.1.Ustava Bosne i Hercegovine),
- e) da nije na funkciji u političkoj stranci u smislu člana 5. Zakona o ministarskim, vladinim i drugim imenovanjima FBiH („Službene novine Federacije BiH“, broj: 12/03),
- f) da nije član organa zakonodavne, izvršne ili sudske vlasti ili savjetnik u smislu Zakona o sukobu interesa u organima vlasti u Federaciji Bosne i Hercegovine („Službeni list FBiH“, broj: 70/08),
- g) da nema privatni finansijski interes u instituciji u kojoj se kandiduje,
- h) da nije osuđen za krivično djelo i privredni prijestup nespojiv s dužnošću u upravnom odboru zdravstvene ustanove, pet godina od dana pravosnažnosti presude,
- i) da nije stariji od 70 godina na dan imenovanja.

Posebni uslovi za imenovanje na upražnjene pozicije predsjednika i članova Upravnog odbora zdravstvene ustanove, su:

- a) VSS (VII/1), ekonomskog, pravnog ili zdravstvenog smjera,
- b) da imaju najmanje 5 godina radnog iskustva u struci,
- c) uživanje ugleda u lokalnoj zajednici,
- d) da nije član nadzornog ili upravnog odbora, odnosno odbora za reviziju u više od jednog privrednog društva,
- e) sposobnost za savjesno, odgovorno i odlučno obavljanje upražnjene pozicije,
- f) sposobnost nepristrasnog donošenja odluka, komunikacijske i organizacijske sposobnosti,
- g) sposobnost tumačenja ekonomskih, tehnoloških i pravnih analiza i propisa,
- h) rezultati rada ostvareni tokom poslovne karijere,
- i) preporuke ranijih neposrednih rukovodilaca, naročito u oblasti zdravstva.

Kandidat za člana Upravnog odbora Javne ustanove „Dom zdravlja“ Zavidovići iz stava (1) ovog člana, ispred stručnih radnika zdravstvene ustanove mogu biti zdravstveni radnici VII stepena stručne spreme sa završenom specijalizacijom.

Za člana Upravnog odbora Javne ustanove „Dom zdravlja“ Zavidovići iz stava (1) ovog člana ispred kantonalnog ministarstva može biti imenovan kandidat kojem Ministarstvo zdravstva Zeničko-dobojskog kantona da saglasnost za imenovanje u Upravni odbor. U slučaju da izostane saglasnost od strane Ministarstva zdravstva Zeničko-dobojskog kantona, Gradsko vijeće Zavidovići imenuje za člana Upravnog odbora Javne ustanove „Dom zdravlja“ Zavidovići prvorangiranog sa liste uspješnih kandidata za člana predstavnika kantonalnog ministarstva.“

## PROVEDBENI MEHANIZMI I NAČIN OSIGURAVANJA POŠTIVANJA ODLUKE

Provedbeni mehanizmi i način osiguravanja poštivanje ove Odluke propisani su Zakonom o ministarskim, vladinim i drugim imenovanjima u Federaciji Bosne i Hercegovine.

## OBRAZLOŽENJE FINANSIJSKIH SREDSTAVA ZA PROVOĐENJE ODLUKE I FINANSIJSKI EFEKTI ODLUKE

Za provođenje ove Odluke nije potrebno planirati finansijska sredstva u Budžetu Grada Zavidovići.

## OPIS KONSULTACIJA VOĐENIH U PROCESU IZRADE ODLUKE

Tokom izrade Odluke vršene su konsultacije Službe za upravu društvenih djelatnosti, pitanja boraca i opću upravu sa Stručnom službom Gradonačelnika.

GRADONAČELNIK

doc. dr. Hašim Mujanović

Obradila: \_\_\_\_\_  
(Nadina Mehinagić)

Kontrolisao: \_\_\_\_\_  
(Idriz Alihodžić)